

***Ta'limning zamonaviy transformatsiyasi***  
АЙБГА ИҚРОРЛИК ТҮҒРИСИДАГИ КЕЛИШУВ

**ИНСТИТУТИНИ ҚЎЛЛАШ ЖАРАЁНИДА ГУМОН ҚИЛИНУВЧИ ВА  
АЙБЛАНУВЧИНИ ҲИМОЯЛАНИШ ҲУҚУҚИ БИЛАН  
ТАЪМИНЛАШ**

*Абдуқаҳхоров Сарварбек Абдусамат ўғли*

*ИИВ Академияси Жиноят ҳуқуқи кафедраси катта ўқитувчиси*

2018 йил 14 май куни Ўзбекистон Республикаси Президентининг “Жиноят ва жиноят-процессуал қонунчилиги тизимини тубдан такомиллаштириш чора-тадбирлари түғрисида”ги ПҚ-3723-сон қарори қабул қилинди. Унда жиноят процесси бўйича рағбатлантирувчи нормаларнинг қўлланилмаслиги ва самарасизлиги инсон ҳуқуqlари ва эркинликларини ишончли ҳимоя қилишга тўсиқ бўлаётгани таъкидлаб ўтилди<sup>1</sup>. Ўзбекистон Республикаси Олий суди Пленумининг 2003 йил 19 декабрдаги “Гумон қилинувчи ва айбланувчини ҳимоя ҳуқуқи билан таъминлашга оид қонунларни қўллаш бўйича суд амалиёти түғрисида”ги 17-сон қарорида ҳимояланиш ҳуқуқига таъриф берилган. Унга кўра гумон қилинувчининг, айбланувчининг ҳимоя ҳуқуқи — юзага келган гумон, кўйилган айбни рад этиш ёки жавобгарлик ва жазони юмшатиш учун унга қонун билан берилган процессуал имкониятлар (восита ва усуллар) йиғиндисидир<sup>2</sup>. Маълумки, мазкур процессуал имкониятларга айбга иқрорлик түғрисида келишув институти ҳам киради.

Айбга иқрорлик түғрисидаги келишув — ўзига нисбатан қўйилган гумонга, айловга рози бўлган, жиноятнинг очилишида фаол ёрдам берган ва келтирилган зарарни бартараф қилган гумон қилинувчи ёки айбланувчининг илтимосномасига асосан жиноят иши юритилишини назорат қилувчи

<sup>1</sup> Ўзбекистон Республикаси Президентининг қарори. Жиноят ва жиноят-процессуал қонунчилиги тизимини тубдан такомиллаштириш чора-тадбирлари түғрисида (2018 йил 14 май, ПҚ-3723-сон) // URL: <https://lex.uz/docs/3735818> (мурожаат вақти: 06.06.2022).

<sup>2</sup> Ўзбекистон Республикаси Олий суди Пленумининг қарори. Гумон қилинувчи ва айбланувчини ҳимоя ҳуқуқи билан таъминлашга оид қонунларни қўллаш бўйича суд амалиёти түғрисида (2003 йил 19 декабрь, 17-сон) // URL: <https://lex.uz/docs/1453755> (мурожаат вақти: 01.08.2022).

## ***Ta'limning zamonaviy transformatsiyasi***

прокурор билан айрим тоифадаги жиноятлар бўйича тузиладиган аҳдлашув.

Айбга иқрорлик тўғрисидаги келишув билан боғлиқ муаммолардан бири унинг амалиётда кам қўлланилаётганидир. Юқоридаги институт ЖПКга киритилганига уч йил бўлганига қарамай, 2021 йилда атиги 85 марта қўлланилган<sup>3</sup>, ҳолбуки шу даврда мамлакатимизда 84 100 та жиноят содир этилган<sup>4</sup>. Бундан кўринадики, мазкур институтнинг қўлланилиш даражаси йил давомида содир этилган жиноятларнинг атиги 0,10 фоизидан кўпроғини ташкил этган. 2022 йилда эса судда кўриб чиқилган умумий жиноятларнинг 021 фоизга яқини бўйича айбга иқрорлик тўғрисидаги келишув қўлланилган<sup>5</sup> Бу рақам қонунчилигига айбига иқрорлик тўғрисида келишув назарда тутилган хорижий давлатлардагига нисбатан жуда камдир. Мисол учун, АҚШда жиноят ишларининг 90 % игача<sup>6</sup>, Германияда 70 % идан ортиғи ана шу тартибда кўриб чиқилади<sup>7</sup>.

Эътиборли жиҳати шундаки, юртимизда мазкур институт қўлланилган шахсларга доир маълумотлар таҳлил қилинганида уларнинг аксарияти юридик маълумотга эга эканлиги ёки ҳуқуқни муҳофаза қилувчи органларда фаолият юритгани аниқланган. Мисол учун, фуқаро А. Халқаро-хуқуқий ишлар бўйича адвокатлар ҳайъатининг адвокати лавозимида ишлаб келган, жиноят содир этиш йўлига кириб, тухмат қилиш, ҳужжатларни қалбакилаштириш ва қалбаки ҳужжатлардан фойдаланиш каби жиноятларни қасдан содир этган. Суд, давлат айловчисининг хулосасини, судланувчининг кўрсатувини тинглаб, фуқаро А.нинг айби унинг ўз айбига тўлиқ иқрорлик билдириб берган кўрсатувлари,

<sup>3</sup> Ўзбекистон Республикаси Олий судининг 2023 йил 14 мартағи 07/14-2336-112-сон хати.

<sup>4</sup> 2021 йилда ҳар учинчи қотиллик оиласи музаммолар туфайли содир этилган — ИИВ // URL: <https://www.gazeta.uz/uz/2022/03/19/iiiv/> (мурожаат вакти: 26.01.2022).

<sup>5</sup> Судлар томонидан 2022 йилда кўриб чиқилган жиноят ишлари юзасидан ахборот// URL: <https://sud.uz/1801-4/> (мурожаат вакти: 19.02.2023).; Ўзбекистон Республикаси Олий судининг 2023 йил 14 мартағи 07/14-2336-112-сон хати.

<sup>6</sup> Алёшина А.Д. Сделки о признании вины в уголовном процессе зарубежных стран // Юридический вестник молодых ученых / А. Д. Алёшина, А. Л. Асланян, К. В. Беляева, В. В. Булатова. — М., 2016. — С. 39 // URL: <https://cyberleninka.ru/article/n/sdelki-o-priznaniyu-viny-v-ugolovnom-protsesse-zarubezhnyh-stran> (Мурожаат этилган сана: 13.07.2021).

<sup>7</sup> Сайдов Б.А. Ишни судга қадар юритиша шахснинг конституциявий ҳуқуқ ва эркинликларини таъминлашни такомиллаштириш: Юрид. фан. д-ри (DSc) ... дис. — Т., 2020. — Б. 98; Макаров А.П. Сделка о признании вины: новация УПК Украины // Ученые записки Таврического национального университета им. В.И.Вернадского. Сер. “Юридические науки”. — 2013. — Т. 26. — № 1. — С. 414–418.

## *Ta'limning zamonaviy transformatsiyasi*

тушунтириш хатлари, эксперт-криминалистика бош марказининг хуносаси, айбга иқорлик тўғрисидаги келишувни тасдиқлаш ҳақидаги қарор ҳамда жиноят ишида тўпланган бошқа далиллар билан исботланган деб топган. Суд айбга иқорлик тўғрисидаги келишувни тасдиқлаб, судланувчига айлов хукмини эълон қилган<sup>8</sup>.

Назаримизда, мазкур институтнинг кам қўлланилишига қўйидаги икки омил сабаб бўлмоқда:

*биринчиси* — суриштирувчи, терговчи, прокурор, суд ва адвокатларнинг ушбу институт ҳақида етарли маълумотга эга эмаслиги. Суд-тергов амалиёти ходимларининг айбга иқорлик тўғрисида келишув институтининг мазмунини билиш-билмаслиги борасида ўтказилган сўровда уларнинг 71 % мазкур институт ҳақида етарли маълумотга эга эмаслиги аниқланди<sup>9</sup>. Бу муаммони ҳал қилиш учун жиноят ишини юритишга масъул мансабдор шахсларнинг, адвокатларнинг малакасини ошириш жараёнида ушбу институтнинг мазмунига батафсил тўхталиш, унинг моҳиятини тўлиқ очиб берадиган видеодарсликлар яратиш ва амалиёт ходимларини улар билан таъминлаш зарур;

*иккинчиси* — гумон қилинувчи, айбланувчининг ушбу институт мавжудлигидан бехабарлиги. Амалдаги ЖПКда гумон қилинувчи ва айбланувчига уларнинг айбига иқорлик тўғрисида келишув тузиш ҳақида илтимоснома бериш ҳуқуқини қайси субъект тушунтириши масаласи очиқ қолган. ЖПКнинг 360-моддасига мувофиқ, суриштирувчи, терговчи гумон қилинувчини ЖПКнинг 48-моддасида белгиланган ҳуқуқлари билан таништириши керак. Юқоридаги моддаларда белгиланган ҳуқуқлар орасида илтимоснома бериш ҳуқуқи кўрсатилган, лекин ҳуқуқий билимга эга бўлмаган гумон қилинувчига илтимоснома бериш ҳуқуқига эга эканлигини айтиб қўйишнинг ўзи унинг ҳуқуқлари таъминланишига кифоя қилмайди. Чунки дастлабки тергов ва суриштирув босқичида бериладиган, келгусида айбдор деб топилган шахсга тайинланадиган жазога бевосита таъсир қиласиган шундай

<sup>8</sup> Жиноят ишлари бўйича Яшнобод туман суди архивидаги 1-1009-2106/237-сон жиноят иши.

<sup>9</sup> 1-илова.

## ***Ta'limning zamonaviy transformatsiyasi***

илтимосномалар борки, уларни алоҳида тушунтириласлик мумкин эмас.

Айбга иқрорлик тўғрисида келишув тузиш ҳақидаги илтимоснома тушунтирилиши мажбурий бўлган илтимосномалар сирасига киради. Суриштирувчи, терговчи айбланувчига айбга иқрорлик тўғрисида келишув тузиш учун илтимоснома бериши мумкинлигини, унинг моҳиятини, прокурор билан мазкур келишувни тузган тақдирда унга нисбатан келгусида Жиноят кодекси Махсус қисмининг тегишли моддасида назарда тутилган энг кўп жазонинг яrimидан қўп бўлмаган миқдори ёки муддатигача жазо тайинланиши мумкинлигини тушунтириши лозим. Бу ишнинг бажарилмаслиги айбга иқрорлик тўғрисидаги келишув институти кенг миқёсда ва барча учун бирдек ишламаслигига олиб келади. Чунки, ЖПКнинг 586<sup>1</sup>-моддасига мувофиқ, айбга иқрорлик тўғрисидаги келишув ижтиомий хавфи катта бўлмаган, унча оғир бўлмаган ва оғир жиноятлар бўйича тузилади. Бундай ишларда эса ҳимоячи иштирок этиши шарт эмас. Агар суриштирувчи, терговчи, ҳимоячи гумон қилинувчи ва айбланувчига айбга иқрорлик тўғрисидаги келишувнинг моҳиятини тушунтирмаса, улар бундай институт борлигини ҳам билмайди. Назаримизда, ҳозирги вақтда айбга иқрорлик тўғрисидаги келишув институти ҳимоячиси бор ёхуд юридик соҳада етарли маълумотга эга шахсларгагина қўлланилмоқда. Юқорида келтирган амалий мисолдан ҳам қўришимиз мумкинки, айбга иқрорлик тўғрисидаги келишув институти адвокатга нисбатан қўлланилган.

Бизнинг фикримизча, суриштирувчи, терговчи шахсга нафақат айбга иқрорлик тўғрисида келишув институтининг, балки амалдаги қонунчилик бўйича унга жазо тайинлашда таъсир қилиши мумкин бўлган бошқа рафбатлантирувчи нормалар, жумладан, ЖК 55, 57<sup>1</sup>, 66<sup>1</sup>-моддаларининг ҳам мазмунини тушунтириб бериши зарур. Масалан, ЖКнинг 55-моддасида жазони енгиллаштирувчи ҳолатлар кўрсатилган бўлиб, улар қўйидагилардир:

- а) айбни бўйнига олиш тўғрисида арз қилиш, чин кўнгилдан пушаймон бўлиш ёки жиноятни очиш учун фаол ёрдам бериш;
- б) етказилган зарарни ихтиёрий равишда бартараф қилиш;

## *Ta'limning zamonaviy transformatsiyasi*

в) оғир шахсий, оиласиб шароитлар оқибатида ёки бошқа мушкул ахволда жиноят содир этиш...<sup>10</sup>.

Шунингдек, амалдаги ЖКнинг 57<sup>1</sup>-моддасида қуидаги қоида келтирилган:

Шахс айбни бўйнига олиш тўғрисида арз қилган, чин кўнгилдан пушаймон бўлган ёки жиноятни очиш учун фаол ёрдам берган, етказилган зарарни ихтиёрий равища бартараф қилган бўлиб, унинг содир этган жиноятида Жиноят кодекси 56-моддасининг биринчи қисмида назарда тутилган жазони оғирлаштирувчи ҳолатлар мавжуд бўлмаган тақдирда жазо муддати ёки миқдори Жиноят кодекси Махсус қисмининг тегишли моддасида назарда тутилган энг кўп жазонинг учдан икки қисмидан ошмаслиги керак<sup>11</sup>.

Амалдаги ЖКнинг 66<sup>1</sup>-моддасида кўрсатилган жиноятлардан бирини содир этган шахс жабрланувчи билан ярашиб, унга нисбатан қўзғатилган жиноят иши тугатилиши мумкинлиги ЖПКнинг 46, 48-моддаларида ўз аксини топмаган.

2022 йилда ярашув институти қўлланилиши натижасида 15 315 нафар шахс жиноий жавобгарликдан озод қилинган<sup>12</sup>. Ёки бўлмаса, 2018–2020 йилларда ярашув тартибида тугатилган жиноят ишлари жами тугатилган жиноят ишларининг ўртacha 22,6 фоизини ташкил этган бўлса, ушбу кўрсаткич Россияда 2019 йилда 58,5 фоизга етган<sup>13</sup>.

Юқорида келтирилган моддаларнинг қоидаларини гумон қилинувчи ва айбланувчига тушунтириб бериш қуидаги ижобий натижаларга олиб келади:

*биринчидан, ЖКнинг 55, 57<sup>1</sup>, 57<sup>2</sup>, 66<sup>1</sup>-моддалари амалда кенг қўлланилишига эришилади. Бу эса, А. Ж. Сайдов тўғри таъкидлаганидек, давлат бюджетининг сарфи камайтирилишига олиб келади<sup>14</sup>;*

<sup>10</sup> Ўзбекистон Республикасининг Жиноят кодекси // URL: <https://lex.uz/acts/111453> (мурожаат вақти: 10.03.2023).

<sup>11</sup> Ўша манба.

<sup>12</sup> Судлар томонидан 2022 йилда кўриб чиқилган жиноят ишлари юзасидан ахборот // URL: <https://sud.uz/1801-4/> (мурожаат вақти: 09.02.2023).

<sup>13</sup> Ушбу статистик рақамлар қуидаги манбадан олинди: Пайзиеv Д.Ю. Ярашилганлиги муносабати билан жавобгарликдан озод қилиш институтини такомиллаштириш: Юрид. фан. бўйича фалсафа д-ри (PhD) ... дис. — Т., 2021. — Б. 5.

<sup>14</sup> Сайдов А.Ж. Жазо тайинлашда рағбатлантирувчи нормаларни қўллашнинг ўзига хос жиҳатлари // URL: <https://zenodo.org/record/6480997#.Yp2y3qhByUk> (мурожаат вақти: 06.06.2022).

## *Ta'limning zamonaviy transformatsiyasi*

иккинчидан, ҳимояланиш хуқуқи самарали амалга оширилишига ижобий таъсир кўрсатади;

учинчидан, келтирилган зарар қисқа муддатларда қопланишига эришилади. 2021 йилда ИИОлари томонидан тергов қилинган жиноят ишлари бўйича шахсларга 1 293 932 797 сўм зарар етказилгани аниқланган бўлиб, шунинг 956 773 034 сўми жиноят иши тамомлангунига қадар ундирилган<sup>15</sup>. Мазкур статистикадан зарарни ундириш масаласи амалиётда мавжуд бўлган энг оғир муаммолардан бири эканлигини кўриш мумкин. Б. А. Сайдов ўз тадқиқоти давомида юздан ортиқ жабрланувчилар билан суҳбат ўтказиб, уларнинг аксариятига етказилган моддий (маънавий) зарарнинг қопланиши уларни “рози” қилишда биринчи ва асосий омил эканлигини аниқлаган<sup>16</sup>;

тўртингчидан, жиноят ишларини юритишда вақт тежалишига олиб келади. 2022 йилда ИИО дастлабки тергов органлари томонидан 39 555 та жиноят иши тамомланган бўлиб, улардан 19 120 таси — 1 ойгача, 14 466 таси — 2 ойгача, 5931 таси эса 3 ойгача тергов қилинган. Ушбу ҳолат ҳамда ҳозир ҳам терговчиларнинг юритувида жиноят ишлари қўплиги берган таклифларимиз нихоятда долзарблигидан далолат беради<sup>17</sup>;

бешинчидан, қонунчиликда мавжуд имтиёзлардан барча фуқаролар бирдек фойдаланишига имкон беради. Масалан, ҳозирги ҳолат бўйича суриштирувчи, терговчи рағбатлантирувчи нормалар билан гумон қилинувчи, айбланувчини таништириши ҳам, таништирмаслиги ҳам мумкин. Демак, бундай имтиёзлардан ҳозирги вақтда асосан адвокат ёллаганлар хабардор бўла олади, чунки адвокат мижозига ЖКда рағбатлантирувчи нормалар мавжудлигини тушунтириши мумкин. Лекин, биз биламизки, ҳар доим ҳам шахснинг адвокат ёллашга хоҳиши ёки имкони бўлавермайди. Бундай гумон қилинувчи ва айбланувчилар уларга қонунчилик бўйича берилган барча имкониятлардан тўлиқ ва самарали фойдалана олмайди. Бу эса, назаримизда, адолатсизлик ҳисобланади.

<sup>15</sup> Ўзбекистон Республикаси ИИВнинг 2021 йилга доир “1 Я” статистик маълумотлари.

<sup>16</sup> Сайдов Б.А. Ишни судга қадар юритиша шахснинг конституциявий хукуқ ва эркинликларини таъминлашни токомиллаштириш: Юрид. фан. д-ри (DSc) ... дис. — Т., 2020. — Б. 130.

<sup>17</sup> Ўзбекистон Республикаси ИИВнинг 2022 йилга доир “1 Я” статистик маълумотлари.

## *Ta'limning zamonaviy transformatsiyasi*

Зеро, Ўзбекистон Республикаси Президенти Шавкат Мирзиёев таъкидлаганидек, “одамлар ҳамма нарсага чидаши мумкин, лекин адолатсизликка чидай олмайди”<sup>18</sup>;

олтинчидан, суриштирувчи ва терговчи томонидан бўлиши мумкин бўлган коррупцион ҳолатларнинг олдини олишга хизмат қилади. Мисол учун, ҳозирги ҳолат бўйича суриштирувчи, терговчи гумон қилинувчига “ёрдам қилиш”, жазони енгиллаштириб бериш учун, гўёки иложсиз нарсанинг иложини қилиб берадиган одамдек, ундан қандайдир моддий манфаат тама қилиши мумкин. Рағбатлантирувчи нормалар гумон қилинувчи ҳамда айбланувчига бевосита тушунтирилганида эса жиноят содир этган шахс жазонинг енгиллаштирилиши суриштирувчи ёки терговчининг ваколати эмас, балки қонунчилик бўйича унга берилган имтиёз эканлигини англаб етади.

Б. А. Саидов ўз тадқиқотида амалдаги ЖПКнинг 46, 48-моддаларини “процессуал келишувлар судда кўрилаётганида иштирок этиш” жумласи билан тўлдириш ғоясини илгари сурган<sup>19</sup>, лекин процессуал келишувнинг мазмун-моҳияти гумон қилинувчи, айбланувчига тушунтирилиши лозимлиги хақида тўхталмаган. Назаримизда, Б. А. Саидовнинг таклифини амалиётга жорий этиш орқали рағбатлантирувчи нормаларнинг жиноят процессида кенг қўлланилишига эришиб бўлмайди. Чунки, гумон қилинувчи, айбланувчини “процессуал келишувлар судда кўрилаётганида иштирок этиш” хуқуки борлигини айтиб қўйиш “биринчи инстанция ва апелляция инстанцияси судининг мажлисларида иштирок этиш” хуқуки сингари умумий маъно касб этади. Яъни гумон қилинувчи, айбланувчи айбига икрорлик тўғрисида келишувнинг ўзи нима, бундай келишув қандай жиноятлар бўйича тузилади, мазкур келишувни у содир этган жиноятга қўлласа бўладими, бунда унинг учун қандай енгилликлар бор, деган саволларга жавоб ололмайди.

Энди рағбатлантирувчи нормаларни гумон қилинувчи, айбланувчига

<sup>18</sup> Шавкат Мирзиёев. Судлар томонидан оқлов ҳукмлари чиқарилмаяпти // URL: <https://www.gazeta.uz/uz/2016/10/22/sud/> (мурожаат вақти: 08.06.2022).

<sup>19</sup> Саидов Б.А. Ишни судга қадар юритища шахснинг конституциявий хуқуқ ва эркинликларини таъминлашни такомиллаштириш: Юрид. фан. д-ри (DSc) ... дис. — Т., 2020. — Б. 253.

## *Ta'limning zamonaviy transformatsiyasi*

тушунтириш борасида тўпланган халқаро тажрибага эътибор қаратсак.

**Қозоғистон Республикасида** (ЖПК, 64, 65-моддалар) гумон қилинувчи, айбланувчига жабрланувчи билан ярашиш, шунингдек процессуал келишув тузиш ҳақида прокурорга мурожаат қилиш ҳуқуқлари тушунтирилиши белгиланган<sup>20</sup>. **Озарбайжон Республикасида** (ЖПК, 90, 91-моддалар) гумон қилинувчи ва айбланувчи жабрланувчи билан ярашиш ҳуқуқидан фойдаланиши мумкинлигини билиши, шунингдек ўзининг ЖПКда белгиланган ҳуқуқларидан тўлиқ хабардор бўлиши лозимлиги кўрсатилган<sup>21</sup>. **Эстония Республикасининг ЖПКга** (34-модда) эътибор қаратадиган бўлсак, унда жиноят ишини юритишга масъул бўлган давлат органининг мансабдор шахси гумон қилинувчининг келишув тузиш сингари ҳуқуқларини тушунтириши кераклиги белгиланганини кўришимиз мумкин<sup>22</sup>.

**Амалдаги ЖПК, суд-тергов амалиёти ҳамда хорижий давлатлар тажрибасини таҳлил этиш асосида, ЖПК 46 ва 48-моддаларининг биринчи қисмини “кўрсатувларидан жиноят ишига доир далиллар сифатида унинг ўзига қарши фойдаланилиши мумкинлиги” деган сўзлардан кейин “Жиноят кодексининг 55, 57<sup>1</sup>, 57<sup>2</sup>, 66<sup>1</sup>- моддалари мазмун-моҳиятини тушунтириб берилишини талаб этиш” деган сўзлар билан тўлдириш ҳамда суриштирувчи, терговчига мазкур институтлар мазмун-моҳиятини гумон қилинувчи ва айбланувчига тушунтириш мажбуриятини юклаш лозим деган фикрдамиз.**

Хулоса ўрнида айтиш мумкинки, шахсга унинг қонунда белгиланган ҳуқуқларини ўз вақтида ва тўлиқ тушунтириш унинг ҳимояланиш ҳуқуки янада самарали амалга оширилишига хизмат қиласди, ҳақиқатни аниqlаш, қонунийлик сингари принципларнинг қўлланилишига ижобий таъсир кўрсатади.

<sup>20</sup> Уголовно-процессуальный кодекс Республики Казахстан (с изменениями и дополнениями по состоянию на 10.01.2022 г.) // URL: <https://zakon.uchet.kz/tus/docs/K1400000231> / (мурожаат вақти: 06.06.2022).

<sup>21</sup> Уголовно-процессуальный кодекс Азербайджанской Республики (утвержден Законом Азербайджанской Республики от 14 июля 2000 года № 907-IQ) (с изменениями и дополнениями по состоянию на 08.06.2022 г.) // URL: [https://online.zakon.kz/Document/?doc\\_id=30420280](https://online.zakon.kz/Document/?doc_id=30420280) (мурожаат вақти: 15.02.2022).

<sup>22</sup> Kriminaalmenetluse seadustik // URL: <https://estlex.ee/?id=76&aktid=54036> (мурожаат вақти: 16.02.2022).